



Broj: 04-04-4-566/24
Sarajevo, 12. 2. 2024. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA 'UPRAVLJANJE
GRANTOVIMA IZ BUDŽETA FEDERACIJE BiH PREMA REZULTATIMA'“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „**Upravljanje grantovima iz Budžeta Federacije BiH prema rezultatima**“, koji je objavljen **2015. godine**. Cilj je bio ispitati preduzete aktivnosti na osnovu Izvještaja i procijeniti u kojoj mjeri su realizovane date preporuke.

Praćenje je obuhvatilo preduzete aktivnosti na realizaciji osam preporuka datih Vladi FBiH. Analizirane su aktivnosti Vlade FBiH i Federalnog ministarstva finansija preduzete u periodu od 2015. do 2023. godine u cilju unapređenja regulatornog okvira koji uređuje oblast tekućih transfera. Pored toga, za budžetsku 2021. i 2022. godinu analizirane su aktivnosti planiranja, dodjele, nadzora i izvještavanja o tekućim transferima na uzorku od šest institucija FBiH.

Rezultati praćenja su pokazali da realizacija preporuka nije bila na zadovoljavajućem nivou imajući u vidu da je od objave matičnog Izvještaja prošlo gotovo devet godina. Od osam preporuka djelimično je provedeno pet, dok su za tri preduzete početne aktivnosti.

Vlada FBiH i Federalno ministarstvo finansija **unaprijedili su regulatorni okvir** koji uređuje upravljanje tekućim transferima. Međutim, institucije nadležne za dodjelu transfera **nisu u potpunosti primjenjivale donesene propise i osigurale odgovarajuće upravljanje tekućim transferima.**

Djelimično su preduzete aktivnosti na implementaciji preporuka koje su se odnosile na planiranje transfera, transparentnost, vrednovanje kriterija za izbor korisnika, te provođenje nadzora. Praćenje je pokazalo da većina institucija nije osigurala adekvatne ulazne podatke potrebne za planiranje programa utroška sredstava tekućih transfera. Unaprijeđena je transparentnost dodjele i izbora korisnika sredstava, međutim u pojedinim slučajevima i dalje nisu objavljivani javni pozivi, dok neki javni pozivi nisu sadržavali sve propisane elemente. Uspostavljeni sistem nadzora uglavnom je usmjeren na kontrolu namjenskog utroška sredstava, međutim, nisu osigurane informacije o ostvarenim rezultatima.

Pokrenute su početne aktivnosti na realizaciji preporuka vezanih za utvrđivanje ciljeva programa, te vršenje analiza i izvještavanje o rezultatima. Utvrđeno je da programi dodjele tekućih transfera i dalje nemaju **jasne i mjerljive ciljeve i očekivane rezultate**. Institucije obuhvaćene praćenjem **nisu osigurale odgovarajuće analize i izvještavanje o uticaju realizovanih programa na ostvarenje strateških ciljeva**, iako su u posmatranom periodu za realizaciju programa utrošile cca. **192 miliona KM.**

Uzimajući u obzir činjenicu da tekući transferi predstavljaju najznačajniju stavku u ukupnim rashodima i izdacima Budžeta FBiH, **predmetni Izvještaj ukazuje na potrebu unapređenja upravljanja ovim sredstvima u cilju jačanja odgovornosti i osiguranja vrijednosti za uloženi javni novac.**



GENERALNI REVIZOR
DŽEVAD NEKIĆ